



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“, broj: 96/13, 89/16, 5/22 i 31/24) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“, broj: 103/08, 5/22 i 39/25), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2022. GODINU SAVEZA ZA BOLJU BUDUĆNOST BIH

Broj: 03-07-6-417/23
Sarajevo, 22.12.2025. godine

S A D R Ź A J

MIŠLJENJE REVIZORA.....	3
1. UVOD	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA	5
Predmet pregleda i kontrole	5
Cilj pregleda i kontrole	5
Obim pregleda i kontrole	5
4. PRETHODNE KONTROLE I REVIZIJE.....	5
5. NALAZI I PREPORUKE.....	6
5.1 NALAZI.....	6
5.2 PREPORUKE	15

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Saveza za bolju budućnost BiH za 2022. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih u oktobru 2022. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, odredbama poglavlja 15 Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2022. godinu, utvrđeno je da je Savez za bolju budućnost BiH prekršio odredbe člana 4. stav (1), člana 5. stav (4), člana 6. stav (5), člana 8. stav (4), člana 11. stav (1) i člana 12. stav (1), stav (3) i stav (4) Zakona o finansiranju političkih stranaka i odredbe člana 15.1 stav (1) Izbornog zakona Bosne i Hercegovine.

Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka, niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Saveza za bolju budućnost BiH za 2022. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih u oktobru 2022. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2022. godinu, Savez za bolju budućnost BiH se finansirao iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	49.181,00	4,70
2.	Prilozi fizičkih lica (3-a)	214.893,50	20,52
3.	Prilozi pravnih lica (3-b)	30.700,00	2,93
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	10.370,16	0,99
7.	Prihodi iz budžeta (3-f)	741.911,95	70,85
8.	Prihodi od propagande (3-g)	0,00	0,00
I	Ukupni prihodi (1-8)	1.047.056,61	99,99
II	Ostali prihodi i drugo	126,16	0,01
	Izvori finansiranja (I+II)	1.047.182,77	100,00

U godišnjem finansijskom izvještaju politička stranka je iskazala rashode u ukupnom iznosu od 1.184.284,94 KM.

2. PREDSTAVLJANJE POLITIČKE STRANKE

Naziv političke stranke je Savez za bolju budućnost BiH. Skraćeni naziv stranke je SBB.

Politička stranka je rješenjem broj: 065-0-F1-09-000035 od 30.10.2009. godine registrovana kod Općinskog suda u Sarajevu, pod nazivom Savez za bolju budućnost Bosne i Hercegovine i skraćenim nazivom SBB BiH. Rješenjem Općinskog suda u Sarajevu broj: 065-0-F1-10-000007 od 31.05.2010. godine, rješenjem broj: 065-0-F1-11-000002 od 18.02.2011. godine i rješenjem broj: 065-0-F1-14-000013 od 14.05.2014. godine upisana je promjena sjedišta i naziva političke stranke. Rješenjem Općinskog suda u Sarajevu broj: 065-0-F1-20-000003 od 02.06.2020. godine upisana je promjena naziva političke stranke, koji glasi: Savez za bolju budućnost BiH i skraćeni naziv SBB.

Sjedište političke stranke je u Sarajevu, ulica Tešanjaska 24 A.

Lice ovlašteno za zastupanje stranke, prema podacima iz godišnjeg finansijskog izvještaja za 2022. godinu je Edis Ramović, direktor stručnih službi¹.

Lice ovlašteno za podnošenje finansijskih izvještaja za 2022. godinu je Edis Ramović.

¹ Prema podacima iz rješenja Općinskog suda u Sarajevu broj: 065-0-F1-23-00003 od 13.10.2023. godine, lice ovlašteno za zastupanje i predstavljanje stranke je Nasir Beganović.

Prema podacima iz godišnjeg finansijskog izvještaja za 2022. godinu, organizacionu strukturu Saveza za bolju budućnost BiH čine:

- Centrala,
- 8 kantonalnih odbora,
- 84 gradska i općinska odbora i
- Klub poslanika.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Saveza za bolju budućnost BiH za 2022. godinu i finansijski izvještaj za period od dana podnošenja prijave za ovjeru za izbore do dana ovjere rezultata Općih izbora, održanih u oktobru 2022. godine.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona Bosne i Hercegovine. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka, te da li je troškove izborne kampanje ostvarila u okviru zakonom utvrđenog limita.

Obim pregleda i kontrole finansijskog izvještaja Saveza za bolju budućnost BiH obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Služba za reviziju obavila je reviziju i pregled finansijskih izvještaja Saveza za bolju budućnost BiH u periodu od 2010. do 2021. godine, nakon čega su izdati izvještaji o reviziji, odnosno izvještaji o pregledu sa nalazima revizije, mišljenjem revizora i preporukama stranci.

Nakon izvršenog pregleda godišnjeg finansijskog izvještaja za 2021. godinu, Služba za reviziju je izdala Izvještaj o pregledu sa mišljenjem revizora, nalazima revizije i preporukama stranci da finansijska sredstva obezbijedena za finansiranje stranke troši u skladu sa svojim programom i statutom, da se ne finansira iz zabranjenih izvora i donacija iznad zakonom propisanog limita, da poslovne knjige vodi u skladu sa računovodstvenim propisima, odnosno da vodi pravilne i potpune evidencije o gotovom novcu, prihodima, rashodima i obavezama, da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka i da sadržaj potvrde uskladi sa odredbama člana 6. Pravilnika o godišnjim finansijskim izvještajima političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2022. godinu, utvrđeno je da Savez za bolju budućnost BiH nije ispoštovao sve preporuke revizije.

5. NALAZI I PREPORUKE

5.1 NALAZI

a) Savez za bolju budućnost BiH prekršio je odredbe člana 4. stav (1)² Zakona o finansiranju političkih stranaka.

- (1) Politička stranka je u godišnjem finansijskom izvještaju za 2022. godinu iskazala ukupne rashode u iznosu od 1.184.284,94 KM od čega se 7.949,55 KM odnosi na troškove amortizacije.

Uvidom u Program utroška sredstava za 2022. godinu, koji je dostavio Savez za bolju budućnost BiH, utvrđeno je da je stranka planirala troškove u ukupnom iznosu od 4.344.920,00 KM, od čega troškove kampanje u iznosu od 2.500.000,00 KM.

Uvidom u strukturu planiranih i ostvarenih troškova utvrđeno je da su planirani troškovi ostvareni u procentu od 27,26% što ukazuje da politička stranka nije realno planirala svoje troškove u odnosu na obim poslovanja političke stranke.

Uporedbom planiranih i ostvarenih troškova utvrđeno je da je politička stranka ostvarila pojedine troškove u odnosu na planirane u procentima kako slijedi: troškovi bruto plata 37,50%, telefonski troškovi i PTT 13%, troškovi komunalnih usluga 28%, ugovori o djelu 30%, troškovi kancelarijskog materijala 20%, troškovi zakupnine poslovnih prostora 38% i troškovi kampanje 23% od planiranih troškova.

- (2) Analizom dostavljenog Programa utroška sredstava za 2022. godinu, utvrđeno je da stranka nije planirala sve troškove, a da je pojedine troškove ostvarila u većem iznosu od planiranih i to:

- Savez za bolju budućnost BiH je ostvario ostale rashode u iznosu od 7.625,49 KM, rashode prethodnih godina u iznosu od 10.154,23 KM, troškove advokatskih usluga u iznosu od 1.656,70 KM, ostale nematerijalne troškove u iznosu od 18,00 KM i troškove usluga u iznosu od 10.965,02 KM, koje nije planirao programom utroška sredstava.

- Politička stranka je prekoračila planirane troškove knjigovodstvenih usluga za 366,26 KM i troškove zakupnine vozila za 1.170,00 KM.

Savez za bolju budućnost BiH je planirao troškove knjigovodstvenih usluga u iznosu od 17.000,00 KM i troškove zakupnine vozila u iznosu od 21.060,00 KM.

U godišnjem finansijskom izvještaju politička stranka je iskazala troškove knjigovodstvenih usluga u iznosu od 17.366,26 KM i troškove zakupnine vozila u iznosu od 22.230,00 KM.

S obzirom da Savez za bolju budućnost BiH nije sačinio realan plan utroška sredstava za 2022. godinu i da je finansijska sredstva u iznosu od 31.955,70 KM ostvario mimo plana, prekršio je odredbe člana 4. stav (1) Zakona o finansiranju političkih stranaka.

b) Savez za bolju budućnost BiH je prekršio odredbe člana 5. stav (4), člana 6. stav (5) i člana 8. stav (1) Zakona o finansiranju političkih stranaka.

Savez za bolju budućnost BiH u poslovnim knjigama nije evidentirao i u godišnjem finansijskom izvještaju nije iskazao novčanu donaciju fizičkog lica, te nenovčane donacije po osnovu besplatnih objava na društvenoj mreži „Facebook“, besplatnog korištenja reklamnih površina („billboard“, „wallscape“, „megaboard“ i „led display“), besplatnog korištenja sala i dvorana za održavanje predizbornih skupova i tribina tokom kampanje i po osnovu korištenja usluga po povoljnijim uslovima, čime je prekršio odredbu člana 5. stav (4) Zakona o finansiranju političkih stranaka.

Politička stranka je, takođe, primila prilog fizičkog lica iznad zakonom dozvoljenog limita na visinu priloga i priloge anonimnih donatora, općina i javnih preduzeća, što je suprotno odredbi člana 6. stav (5) i člana 8. stav (1) tačka Zakona o finansiranju političkih stranaka.

² Prema odredbama člana 4. stav (1) Zakona o finansiranju političkih stranaka, finansijska sredstva iz člana 3. stav (1) navedenog Zakona stranka može koristiti isključivo za ostvarivanje ciljeva utvrđenih svojim programom i statutom.

- (1) Uvidom u poslovne knjige i kontrolom izvoda sa transakcijskih računa stranke utvrđeno je da je fizičko lice Senad Salkić dva puta u toku godine uplatio sredstva na račun političke stranke i to: dana 21.06.2022. godine članarinu u iznosu od 24,00 KM i dana 11.08.2022. godine donaciju i članarinu u iznosu od 15.000,00 KM. Ukupan iznos uplaćenih sredstava fizičkog lica Senad Salkić, u toku 2022. godine iznosi 15.024,00 KM.

Kako je ukupan iznos sredstava, uključujući i članarinu, koje je član političke stranke u toku jedne kalendarske godine uplatio na račun političke stranke veći za 24,00 KM od zakonom dozvoljenog iznosa, Savez za bolju budućnost BiH je prekršio odredbu člana 6. stav (5) Zakona o finansiranju političkih stranaka.

Kontrolom izvoda sa transakcijskih računa i uvidom u poslovne knjige utvrđeno je da je Savez za bolju budućnost BiH novčanu donaciju fizičkog lica Senad Salkić u iznosu od 24,00 KM nije evidentirao u poslovnim knjigama i nije iskazao u godišnjem finansijskom izvještaju, čime je prekršio odredbe člana 5. stav (4) Zakona o finansiranju političkih stranaka.

- (2) Savez za bolju budućnost BiH nije u poslovnim knjigama i godišnjem finansijskom izvještaju iskazao nenovčane donacije po osnovu besplatnih objava na društvenoj mreži „Facebook“, čime je prekršio odredbe člana 5. stav (4) Zakona o finansiranju političkih stranaka.

Naime, Savez za bolju budućnost BiH nije uspostavio evidencije u poslovnim knjigama i nije prijavio u finansijskom izvještaju nenovčane donacije koje je ostvario promocijom stranke i njenih kandidata putem društvene mreže „Facebook“ gdje je prema podacima sa platforme „AdLibrary“, objavljeno 97 oglasa ukupne vrijednosti 3.570,00 KM.

- Prema raspoloživim podacima utvrđeno je da su putem društvene mreže „Facebook“ fizička lica promovisala stranku i njene kandidate na Općim izborima 2022. godine, kako slijedi: Edis Ramović u iznosu od 1.172,00 KM, Suad Kurtćehajić u iznosu od 495,00 KM, Fuad Hadžimehmedović u iznosu od 434,00 KM, Elvir Rožnjaković u iznosu od 423,00 KM, Sanela Prašović-Gadžo u iznosu od 317,00 KM i Edita Đapo u iznosu od 228,00 KM, a koje politička stranka nije prijavila u godišnjem finansijskom izvještaju.

Takođe je utvrđeno da su fizička lica: Almedin Ćatić, Elvir Rožnjaković, Sanela Fijuljanin, Amer Kapo, Sedad Muhić, Anis Krivić, Maja Brigić i Vesko Drljača na društvenoj mreži „Facebook“ promovisali stranku i njene kandidate na Općim izborima 2022. godine putem 17 oglasa male vrijednosti za koje nije utvrđen tačan iznos oglašavanja.

- Uvidom u podatke sa platforme „AdLibrary“ utvrđeno je da je pravno lice „Outdoor Marketing“ d.o.o. Tuzla putem društvene mreže „Facebook“ promovisalo stranku i njene kandidate putem 13 objava na društvenim mrežama u iznosu od 501,00 KM, dok za dva oglasa male vrijednosti nije utvrđen ukupan iznos oglašavanja.
- Na osnovu dostavljenih podataka utvrđeno je da je deset oglasa male vrijednosti, za koje nije utvrđen ukupni iznos oglašavanja, objavljeno od strane anonimnog donatora.

S obzirom da politička stranka nije platila uslugu objave na društvenoj mreži „Facebook“, niti je u postupku pregleda predložena dokumentacija na osnovu koje bi se utvrdio identitet donatora koji je izvršio plaćanje objava, Savez za bolju budućnost BiH je ostvario novčanu donaciju anonimnih donatora, što je suprotno odredbama člana 8. stav (1) Zakona o finansiranju političkih stranaka.

- (3) Uvidom u podatke o oglašavanju putem reklamnih površina na Općim izborima 2022. godine, koje je dostavio „Transparency International BiH“, utvrđeno je da je Savez za bolju budućnost BiH tokom izborne kampanje 2022. godine koristio reklamne površine u Bihaću (1 „billboard“ i 1 „wallscape“), Brčkom (3 „billboard“), Bugojnu (2 „billboard“), Sarajevu (3 „billboard“ i 1 „led display“ u općini Centar Sarajevo, 1 „billboard“ u općini Novo Sarajevo, 2 „billboard“ i 1 „led display“ u općini Novi Grad Sarajevo i 2 „led display“ u općini Stari Grad Sarajevo), Doboju Istok (2 „billboard“), Doboju Jug (2 „billboard“), Fojnici (5 „billboard“ i 1 „led display“), Gračanici (7 „billboard“), Mostaru (9 „billboard“ i 1 „megaboard“), Gradačcu (2 „billboard“), Ilidži (1 „led display“), Jajcu (1 „billboard“), Kalesiji (1 „billboard“), Kiseljaku (1 „billboard“),

Ključu (1 „billboard”), Maglaju (1 „billboard”), Novom Travniku (2 „billboard”), Orašju (1 „billboard”), Travniku (3 „billboard”), Tuzli (4 „billboard” i 1 „led display”), Visokom (1 „megaboard”), Vitezu (2 „billboard”), Zavidovićima (3 „billboard” i 1 „led display”), Zenici (2 „billboard” i 2 „led display”), Žepču (1 „billboard” i 1 „led display”) i Živinicama (3 „billboard” i 1 „led display”) za koje politička stranka nema dokumentaciju.

Činjenica da je „Transparency International BiH” evidentirao reklamne površine na kojima se oglašavala stranka, a da stranka nema dokumentaciju o zakupu reklamnih površina na 80 lokacija³, ukazuje da je stranka u toku predizborne kampanje besplatno koristila reklamne površine, odnosno da je ostvarila nenovčane donacije procijenjene vrijednosti od 65.450,00 KM⁴.

Politička stranka u poslovnim knjigama nije evidentirala i u finansijskom izvještaju nije prijavila nenovčane donacije donatora čiji identitet nije poznat, čime je prekršila odredbe člana 5. stav (4) i člana 8. stav (1) Zakona o finansiranju političkih stranaka.

- (4) Pregledom podataka koje je dostavio „Transparency International BiH” i dokumentacije o troškovima zakupa sala i dvorana, koje je u toku obavljanja pregleda predočila politička stranka, utvrđeno je da je politička stranka koristila sale i dvorane za održavanje predizbornih skupova i tribina tokom kampanje za Opće izbore 2022. godine u Fojnici (Sala Hotela Reumal), Visokom (prostor Kulturnog centra Altindag), Gračanici (BKC Gračanica), Gradačcu (Sala „Euro profi” Gradačac), Zavidovićima (J.U. „Centar za kulturu” Zavidovići), Zenici (Bosansko narodno pozorište) i Ilidži (Hotel Hills Ilidža), te da za njihovo korištenje nije platila naknadu.

S obzirom da politička stranka nije evidentirala troškove iznajmljivanja prostora, te da iste nije platila, ostvarila je nenovčane donacije nepoznatih donatora, čime je prekršila odredbe člana 5. stav (4) i člana 8. stav (1) Zakona o finansiranju političkih stranaka.

- (5) Savez za bolju budućnost BiH nije u godišnjem finansijskom izvještaju prijavio nenovčanu donaciju koju je ostvario po osnovu zakupa reklamnih površina i konzumacije hrane po povoljnijim uslovima, čime je prekršio odredbe člana 5. stav (4) Zakona o finansiranju političkih stranaka.

- Politička stranka nije u godišnjem finansijskom izvještaju prijavila nenovčanu donaciju pravnog lica „EuroplakatBH” d.o.o. Sarajevo po osnovu zakupa 154 reklamne površine za billboard, city light, backlight, superboard, bus stajalište i led display po povoljnijim uslovima. Dobavljač „EuroplakatBH” d.o.o. Sarajevo je za zakup 154 reklamne površine (billboard, backlight, superboard, citylight i bus stajalište) u periodu od 02.09.2022. do 30.09.2022. godine izdao fakturu br. 720-09/22 od 14.09.2022. godine u iznosu od 128.748,11 KM. Uvidom u fakturu dobavljača utvrđeno je da pojedinačne cijene značajno odstupaju od ponuđenih cijena zakupa, te da je dobavljač političkoj stranci odobrio rabat od 20,00 %, odnosno 27.510,28 KM.

Na osnovu navedenog, utvrđeno je da je politička stranka ostvarila nenovčanu donaciju pravnog lica „Europlakat BH” d.o.o. Sarajevo u iznosu od 27.510,28 KM, koju je trebala evidentirati u poslovnim knjigama, te prijaviti u finansijskom izvještaju.

- Savez za bolju budućnost BiH nije u godišnjem finansijskom izvještaju prijavio nenovčanu donaciju pravnog lica „Avaz” d.o.o. Sarajevo-Hotel „Radon Plaza” koju je ostvario po osnovu besplatne konzumacije hrane u Zlatnom salonu hotela. Uvidom u fakturu dobavljača „Avaz” d.o.o. Sarajevo-Hotel „Radon Plaza” broj: 2079/22 od 27.04.2022. godine u iznosu od 5.880,00 KM utvrđeno je da je dobavljač političkoj stranci odobrio rabat u iznosu od 2.520,00 KM.

U skladu sa navedenim, utvrđeno je da je politička stranka ostvarila nenovčanu donaciju pravnog lica „Avaz” d.o.o. Sarajevo-Hotel „Radon Plaza” u iznosu od 2.520,00 KM, koju nije evidentirala u poslovnim knjigama i nije prijavila u finansijskom izvještaju.

³ Oglašavanje na sljedećim reklamnim površinama: 65 „billboard”, 1 „wallscape”, 2 „megaboard” i 12 „led display”.

⁴ Prilikom obračuna iznosa nenovčanih donacija uzeta je cijena zakupa reklamnih površina prema cjenovniku dobavljača „Dibs 98 oprema” d.o.o. BIHać za „billboard” u iznosu od 850,00 KM i „led display” u iznosu od 600,00 KM), dok je za zakup „wallscape”, „megaboard” uzeta cijena u iznosu od 1.000,00 KM prema podacima sa računa dobavljača „Max media” d.o.o. Sarajevo.

c) Savez za bolju budućnost BiH je prekršio odredbe člana 8. stav (4) Zakona o finansiranju političkih stranaka.

Na osnovu obavljenog pregleda finansijskog izvještaja, utvrđeno je da je Savez za bolju budućnost BiH primio prilog u iznosu od 10.000,00 KM od pravnog lica, koje je u toku 2022. godine imalo zaključen ugovor o javnoj nabavci roba sa organima izvršne vlasti u Bosni i Hercegovini čija je vrijednost veća od 10.000,00 KM, čime je prekršio odredbe člana 8. stav (4) Zakona o finansiranju političkih stranaka.

Politička stranka je dana 21.09.2022. godini primila prilog pravnog lica „EURO STIL“ d.o.o. Doboj u iznosu od 10.000,00 KM.

Prema podacima koje je dostavila Općina Olovo, pravno lice „EURO STIL“ d.o.o. Doboj je tokom 2022. godine imalo zaključen Ugovor o nabavci peleta sa Općinom Olovo u vrijednosti od 54.054,00 KM.

d) Savez za bolju budućnost BiH prekršio je odredbe člana 11. i člana 12. stav (1), stav (3) i stav (4) Zakona o finansiranju političkih stranaka i člana 15.1 stav (1) Izbornog zakona Bosne i Hercegovine

Pregledom finansijskih izvještaja, utvrđeno je da Savez za bolju budućnost BiH nije u poslovnim knjigama uspostavio pravilne i potpune evidencije o gotovom novcu, prihodima, rashodima i obavezama, te obrasce godišnjeg finansijskog izvještaja za 2022. godinu nije popunio u skladu sa odredbama Pravilnika o godišnjim finansijskim izvještajima političkih stranaka (u daljem tekstu: Pravilnik), čime je prekršio odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

- (1) Savez za bolju budućnost BiH nije u obrascu 2 (pregled prometa svih transakcijskih računa političke stranke) iskazao tačne podatke o prometu i stanju na transakcijskom računu broj: 1321002023258212 kod NLB banke d.d. Sarajevo, čime je prekršio odredbe člana 11. Pravilnika.

Politička stranka je u godišnjem finansijskom izvještaju prijavila transakcijski račun broj: 1321002023258212 kod NLB banke d.d. Sarajevo, za koji je iskazala početno stanje u iznosu od 1.519,71 KM, ukupan promet ulaza u iznosu od 25.448,38 KM, ukupan promet izlaza u iznosu od 23.156,87 KM i stanje na dan 31.12.2022. godine u iznosu od 3.811,22 KM.

Kontrolom izvoda sa navedenog računa utvrđeno je da je u 2022. godini politička stranka ostvarila promet i to: početno stanje u iznosu od 1.519,71 KM, promet ulaza u iznosu od 25.448,38 KM, promet izlaza u iznosu od 23.100,87 KM i stanje na dan 31.12.2022. godine u iznosu od 3.867,22 KM.

- (2) Kontrolom blagajne Centrale političke stranke utvrđeno je da blagajnički izvještaji nisu vođeni u skladu sa propisima o blagajničkom poslovanju, te da pojedine isplate nisu vršene na osnovu validne dokumentacije.

- Uvidom u dnevnik blagajne Brčko za septembar 2022. godine utvrđeno je da je isti sačinjen za period 01.09-30.09.2022. godine, a ne na dan kada su promjene nastale, što je suprotno računovodstvenim propisima.

- Kontrolom blagajne utvrđeno je da je politička stranka iz blagajne platila nabavku pića po računu dobavljača „Lombardija“ d.o.o. Brčko od 09.09.2022. godine u iznosu od 1.781,00 KM, i nabavku laptop-a po računu dobavljača „Oscar“ s.p., vl. T.S. Brčko, broj: 228 od 13.09.2022. godine u iznosu od 550,00 KM.

Gotovinskim plaćanjem izvršenih usluga u iznosu većem od 200,00 KM, Savez za bolju budućnost BiH je postupio suprotno odredbama Uredbe o uslovima i načinu plaćanja gotovim novcem.

- (3) Na osnovu obavljenog pregleda, utvrđeno je da stranka u godišnjem finansijskom izvještaju nije iskazala tačne podatke o članarinama i prilogima fizičkih lica i nije iskazala tačne podatke o donatoru (ime i prezime), čime je prekršila odredbe člana 13. i 14. Pravilnika.

Savez za bolju budućnost BiH je u godišnjem finansijskom izvještaju iskazao prihode od članarine u iznosu od 49.181,00 KM i priloge fizičkih lica u iznosu od 214.893,50 KM.

Pregledom finansijskog izvještaja i izvoda sa transakcijskih računa, utvrđeno je sljedeće:

- Politička stranka je u obrascu 3-a iskazala članarine sljedećih fizičkih lica: Đapo Edita u iznosu od 1.500,00 KM, Edis Ramović u iznosu od 10.000,00 KM, Emina Idrizović u iznosu od 3.000,00 KM, Fahrudin Radončić u iznosu od 14.500,00 KM, Jupiće Amra u iznosu od 5.024,00 KM, Nermin Džindić u iznosu od 1.440,00 KM i Nermin Džino u iznosu od 3.000,00 KM.

Odlukom o prikupljanju i raspodjeli članarine i načinu izdavanja članskih kartica broj: 31-02/11 od 13.01.2011. godine utvrđeno je da članovi koji ostvaruju naknadu ili plaću koja proizlazi iz mandata SBBiH plaćaju članarinu u iznosu od 2%-4% mjesečno i to: izabrani poslanici i delegati u PS BiH, Parlamentu FBiH, poslanici u kantonalnim skupštinama; nosioci izvršnih funkcija na novou BiH, FBiH, RS i kantona; članovi općinskog ili gradskog vijeća i nosioci izvršnih funkcija na nivou općine i grada.

S obzirom da stranka ne vodi registar članova stranke, te da nema podatke o ličnim primanjima navedenih fizičkih lica, mišljenja smo da je politička stranka primila članarine iznad visine članarine koja je propisana Odlukom o prikupljanju i raspodjeli članarine i načinu izdavanja članskih kartica broj: 31-02/11 od 13.01.2011. godine, tj. primila je priloge koje je trebala iskazati u obrascu 3-a godišnjeg finansijskog izvještaja, čime je prekršila odredbe člana 13. i 14. Pravilnika.

- Stranka je u obrascu 3-a iskazala donacije fizičkih lica Edin Rovčanin u iznosu od 9.600,00 KM i Emir Mujadžić u iznosu od 3.024,00 KM, za koje je izdala potvrde o uplati donacije. Kontrolom izvoda sa transakcijskog računa utvrđeno je da su navedena fizička lica u toku 2022. godine uplatila članarine i priloge, kako slijedi: Emir Mujadžić je dana 04.07.2022. godine na ime članarine i priloga uplatio sredstva u iznosu od 3.024,00 KM, dok je Edin Rovčanin dana 01.08.2022. godine uplatio članarinu i prilog u iznosu od 5.000,00 KM, a dana 02.08.2022. godine članarinu i prilog u iznosu od 4.600,00 KM.

S obzirom da su fizička lica kao svrhu uplate navela članarinu i donaciju, politička stranka je u godišnjem finansijskom izvještaju trebala iskazati i članarinu u skladu sa Odlukom o prikupljanju i raspodjeli članarine i načinu izdavanja članskih kartica broj: 31-02/11 od 13.01.2011. godine.

- Politička stranka je u obrascu 3-a iskazala prilog i izdala potvrdu o primljenoj donaciji od fizičkog lica Mirnes Vukanović u iznosu od 2.880,00 KM.

Kontrolom izvoda sa transakcijskog računa utvrđeno je da je fizičko lice Mirnes Vukanović političkoj stranci uplatio donaciju u iznosu od 2.880,00 KM.

- (4) Kontrolom izdatih potvrda o primljenim prilogima fizičkih lica, utvrđeno je da politička stranka nije izdala potvrde o primljenim prilogima za sve primljene priloge fizičkih lica i nije navela sve potrebne podatke o donatorima (broj lične karte i adresa), čime je prekršila odredbe člana 6. Pravilnika.

Stranka nije izdala potvrdu o primljenoj donaciji za fizičko lice Emina Idrizović. Kontrolom izvoda sa transakcijskog računa utvrđeno je da je dana 19.07.2022. godine Emina Idrizović uplatila prilog u iznosu od 3.000,00 KM.

Takođe, uvidom u izdate potvrde utvrđeno je da u potvrdama o primljenim donacijama za 50 donatora-fizičkih lica nedostaju podaci o broju lične karte i adresi donatora.

Isto tako, politička stranka u potvrdama o primljenim donacijama od pravnih lica nije navela podatke o sjedištu pravnih lica, dok za pravno lice „Euro stil“ d.o.o. Doboj nije upisan tačan naziv pravnog lica.

U skladu sa odredbama iz člana 6. Pravilnika, politička stranka je dužna svakom fizičkom i pravnom licu od kojeg je primila članarinu ili prilog izdati potvrdu u kojoj su sadržani sljedeći podaci: naziv političke stranke, serijski broj potvrde, ukupan iznos članarine/priloga, ime i prezime/naziv donatora, broj ličnog dokumenta/identifikacioni broj donatora, adresa i mjesto prebivališta/sjedišta donatora, datum uplate, datum izdavanja potvrde i potpis ovlaštenog lica.

(5) Savez za bolju budućnost BiH nije u godišnjem finansijskom izvještaju pravilno iskazao nenovčane donacije, čime je prekršio odredbe člana 13. i 18. Pravilnika.

- U obrascu 3 (izvori finansiranja) i 3-e (nenovčane donacije i računi koje stranka nije imala obavezu platiti) godišnjeg finansijskog izvještaja politička stranka nije iskazala nenovčane donacije pravnih lica „Europlakat BH“ d.o.o. Sarajevo i „Avaz“ d.o.o. Sarajevo-Hotel „Radon Plaza“, nenovčane donacije po osnovu besplatnog korištenja sala i dvorana za održavanje predizbornih skupova, besplatnog oglašavanja na društvenoj mreži „Facebook“ i oglašavanja putem „billboard“, „backlight“, „citylight“, bus stajališta i „superboard“ tokom izborne kampanje 2022. godine, čime je prekršila odredbe člana 13. i 18. Pravilnika.

- Kontrolom poslovnih knjiga i obrasca 3-e godišnjeg finansijskog izvještaja utvrđeno je da politička stranka nije pravilno iskazala nenovčane donacije po osnovu korištenja poslovnog prostora bez naknade u Visokom i Zavidovićima.

1. Politička stranka je u obrascu 3-e iskazala nenovčanu donaciju po osnovu besplatnog korištenja poslovnog prostora u Visokom u iznosu od 1.008,00 KM.

Uvidom u Ugovor o zakupu poslovnog prostora kojim pravo raspolaganja ima Grad Visoko, broj: 03-1-19-118/20 od 16.07.2020. godine, utvrđeno je da je poslovni prostor političkoj stranci dat u zakup uz mjesečnu naknadu od 158,39 KM.

Na osnovu navedenog, utvrđeno je da politička stranka nije ostvarila prihode po osnovu korištenja poslovnog prostora bez naknade u Visokom 1.008,00 KM, čime je ukupne prihode iskazala u većem iznosu u odnosu na ostvarene.

2. U obrascu 3-e politička stranka je iskazala nenovčanu donaciju po osnovu besplatnog korištenja poslovnog prostora u Zavidovićima u iznosu od 2.744,40 KM.

Uvidom u dopis Grada Zavidovići broj: 01-04-4/23-AP-92 od 08.09.2023. godine utvrđeno je da politička stranka bez naknade koristi poslovni prostor površine 23 m², te da je prihod od nenovčane donacije po osnovu korištenja poslovnog prostora bez naknade iskazala u iznosu manjem za 15,60 KM.

(6) Savez za bolju budućnost BiH nije u godišnjem finansijskom izvještaju pravilno iskazao prihode iz budžeta, čime je prekršio odredbe člana 19. Pravilnika.

- Politička stranka je u obrascu 3-f (prihodi iz budžeta) iskazala prihod iz budžeta Zeničko-dobojskog kantona u iznosu 32.831,72 KM i prihod iz budžeta Kantona Sarajevo u iznosu od 51.022,02 KM.

Kontrolom izvoda sa transakcijskog računa utvrđeno je da je politička stranka iz budžeta Zeničko-dobojskog kantona primila sredstva u iznosu od 35.879,35 KM, dok je iz budžeta Kantona Sarajevo primila sredstva u iznosu od 47.974,40 KM.

- Savez za bolju budućnost BiH je u godišnjem finansijskom izvještaju iskazao prihode iz budžeta Opštine Novi Grad u iznosu od 9.999,96 KM.

Kontrolom izvoda sa transakcijskog računa utvrđeno je da su na račun stranke iz budžeta Općine Novi Grad Sarajevo uplaćena sredstva u iznosu od 9.999,96 KM.

(7) Savez za bolju budućnost BiH nije u poslovnim knjigama i godišnjem finansijskom izvještaju iskazao pravilne i potpune podatke o svojim rashodima, čime je prekršio odredbe člana 21, 22. i 23. Pravilnika.

- Uvidom u poslovne knjige i ugovore o zakupu poslovnih prostora utvrđeno je da stranka u godišnjem finansijskom izvještaju troškove zakupnine poslovnih prostora koje su koristili Centrala stranke i odbori u Banovićima, Bihaću, Donjem Vakufu, Gračanici, Kaknju, Kladnju, Kalesiji, Mostaru, Sarajevo Centar, Novom Gradu Sarajevo, Novom Sarajevu, Sanskom Mostu, Srebreniku, Tešnju, Tuzli, Visokom, Velikoj Kladuši, Zavidovićima i Živinicama iskazala u iznosu manjem za 5.322,65 KM od ostvarenih, čime je prekršila odredbe člana 21. i 22. Pravilnika.

Savez za bolju budućnost BiH je iskazao manje troškove zakupnine poslovnih prostora u Banovićima za 96,32 KM, Bihaću za 600,00 KM, Donjem Vakufu za 861,00 KM, Gračanici za 600,00 KM, Kaknju za 350,00 KM, Mostaru za 1.012,50 KM, Novom Gradu Sarajevo za 631,80 KM, Srebreniku za 351,00 KM, Tešnju za 504,16 KM, Tuzli za 210,14 KM, Visokom za 100,58 KM, Velikoj Kladuši za 500,00 KM, Zavidovićima za 15,60 KM i Živinicama za 600,00 KM.

Sa druge strane, troškovi zakupnine poslovnih prostora koje je koristila Centrala političke stranke, te odbori Kladanj, Kalesija, Sanski Most i Centar Sarajevo su iskazani u većem iznosu od ostvarenih, kako slijedi: Centrala za 433,05 KM, Kladanj za 300,00 KM, Kalesija za 56,00 KM, Sanski Most za 250,00 KM i Centar Sarajevo za 71,40 KM.

- Uvidom u poslovne knjige utvrđeno je da je stranka u okviru rashoda iz prethodnih godina evidentirala troškove u iznosu od 4.288,00 KM po računu dobavljača Restoran i noćni klub „Pivnica“ Mostar broj: 01-11/21 od 13.11.2021. godine, a koji se odnosi na nabavku ugostiteljskih usluga. Navedeno ukazuje da politička stranka ne vodi pravovremene i tačne evidencije o svojim troškovima i obavezama.
- Savez za bolju budućnost BiH je u poslovnim knjigama i godišnjem finansijskom izvještaju iskazao troškove reprezentacije u iznosu od 45.627,18 KM.

1. Politička stranka je u poslovnim knjigama i u godišnjem finansijskom izvještaju iskazala troškove reprezentacije po osnovu konzumacije hrane u manjem iznosu u odnosu na stvarne za 2.520,00 KM. Kao što je navedeno u nalazu pod b), pravno lice „Avaz“ d.o.o Sarajevo, Hotel „Radon Plaza“ je za usluge konzumacije hrane odobrio rabat u iznosu od 2.520,00 KM.

Pored navedenog utvrđeno je da je politička stranka račun dobavljača „Avaz“ d.o.o. Sarajevo-Hotel „Radon Plaza“ broj: 2079/22 od 27.04.2022. godine u iznosu od 5.880,00 dva puta evidentirala u poslovnim knjigama i to kao troškove reprezentacije Centrale u iznosu od 5.880,00 KM i troškove reprezentacije OO Novi Grad Sarajevo u iznosu od 4.000,00 KM, OO Ilidža u iznosu od 1.500,00 KM i OO Hadžići u iznosu od 380,00 KM.

2. Uvidom u dostavljene račune utvrđeno je da je politička stranka kao troškove reprezentacije iskazala nabavku laptop-a u iznosu od 550,00 KM i troškove izborne kampanje u iznosu od 2.461,00 KM.

- Politička stranka je nabavku laptop-a Acer u poslovnim knjigama evidentirala i u godišnjem finansijskom izvještaju iskazala kao troškove reprezentacije. Uvidom u fiskalni račun dobavljača „Oscar“ s.p. vl. T.S. Brčko, broj: 228 od 13.09.2022. godine u iznosu od 550,00 KM za nabavku laptop-a utvrđeno je da isti nije potpisan od strane lica koje je u ime stranke preuzelo laptop od dobavljača, niti je ovjeren za knjiženje i plaćanje. Na osnovu dostupne dokumentacije, nije moguće utvrditi ko je korisnik navedenog laptop-a.

Stranka je suprotno računovodstvenim propisima, nabavku laptop-a proknjižila na konto troškova reprezentacije, čime je izbjegla vođenje evidencije o materijalnim sredstvima stranke.

- Uvidom u dostavljene račune utvrđeno je da je politička stranka troškove po računu pravnog lica „Lombardija“ d.o.o. Brčko od 09.09.2022. godine u iznosu od 1.781,00 KM za nabavku vode, sokova i alkoholnog pića i računu dobavljača „Hotel Sax“ vl. S.A., Gračanica, broj: 736/2022 od 17.09.2022. godine u iznosu od 680,00 KM za usluge noćenja sa doručkom, a koji se odnose na period predizborne kampanje, iskazala kao troškove reprezentacije u okviru režijsko-administrativnih i ostalih troškova.

Savez za bolju budućnost BiH je troškove reprezentacije koji se odnose na izbornu kampanju trebao iskazati u obrascu 4.2 (troškovi propagande) godišnjeg finansijskog izvještaja.

- Politička stranka nije u poslovnim knjigama evidentirala i nije u finansijskom izvještaju iskazala troškove zakupa sala i dvorana, za održavanje predizbornih skupova i tribina koje je politička stranka koristila tokom kampanje za Opće izbore 2022. godine u Fojnici (Sala Hotela Reumal), Visokom (prostor Kulturnog centra Altindag), Gračanici (BKC Gračanica), Gradačcu (Sala „Euro profi“ Gradačac), Zavidovićima (J.U. „Centar za kulturu“ Zavidovići), Zenici (Bosansko narodno pozorište) i Ilidži (Hotel Hills Ilidža).
- Savez za bolju budućnost BiH u svojim poslovnim knjigama i finansijskom izvještaju nije iskazao troškove zakupa reklamnih površina („billboard“, „wallscape“, „megaboard“ i „led display“), čime je troškove kampanje iskazao u manjem iznosu za 65.450,00 KM u odnosu na ostvarene.

„Transparency International BiH“ je Centralnoj izbornoj komisiji Bosne i Hercegovine dostavio podatke o oglašavanju na Općim izborima 2022. godine, dok je politička stranka tokom obavljanja pregleda finansijskih izvještaja predočila podatke o zakupu reklamnih površina za vanjsko oglašavanje. Pregledom raspoložive dokumentacije utvrđeno je da se politička stranka oglašavala na više lokacija, a da nema dokumentaciju o plaćanju za 80 lokacije (65 „billboard“, 1 „wallscape“, 2 „megaboard“ i 12 „led display“), procijenjene vrijednosti 65.450,00 KM.

Pored navedenog, utvrđeno je da se Savez za bolju budućnost BiH tokom izborne kampanje 2022. godine oglašavao putem „led display“ u vlasništvu pravnog lica „Max media“ d.o.o. Sarajevo, koji nije evidentiran kao dobavljač u poslovnim knjigama, što, takođe, ukazuje da stranka nije izvršila plaćanje za oglašavanje na reklamnim površinama.

- Savez za bolju budućnost BiH je troškove zakupa 154 površine za „billboard“, „city light“, „backlight“, „superboard“ i „bus stajalište“ iskazao u manjem iznosu u odnosu na stvarne za 27.510,28 KM. Kao što je u navedeno u nalazu pod b), dobavljač „Europlakat BH“ d.o.o. Sarajevo je za zakup 154 reklamne površine stranci odobrio rabat od 20%, odnosno ukupno 27.510,28 KM.
 - Politička stranka nije u godišnjem finansijskom izvještaju iskazala troškove izborne kampanje po osnovu objava na društvenoj mreži „Facebook“ u vrijednosti od 3.570,00 KM⁵.
- (8) Savez za bolju budućnost BiH nije u godišnjem finansijskom izvještaju evidentirao i u poslovnim knjigama nije pravilno iskazao obaveze prema dobavljačima na dan 31.12.2022. godine, čime je prekršio odredbe člana 24. Pravilnika.
- Politička stranka je zbog pogrešno evidentiranih troškova i obaveza u poslovnim knjigama, u godišnjem finansijskom izvještaju pogrešno iskazala obaveze prema pravnim licima „Avaz“ d.o.o i Radon plaza Hotel.
- Politička stranka je u poslovnim knjigama i godišnjem finansijskom izvještaju iskazala obaveze prema dobavljačima „Avaz“ d.o.o. u iznosu od 5.444,58 KM i Radon plaza Hotel u iznosu od 5.880,00 KM, što ne odgovara stvarnom stanju.

⁵ Kao što je navedeno u nalazu pod b) tačka 1.

Naime, politička stranka je, kao što je već navedeno u nalazu pod d) tačka 7, dva puta proknjižila račun pravnog lica „Avaz“ d.o.o. Sarajevo-Hotel “Radon Plaza” broj: 2079/22 od 27.04.2022. godine u iznosu od 5.880,00 KM te je troškove i obaveze iskazala u iznosu većem od ostvarenih za 5.880,00 KM.

- U godišnjem finansijskom izvještaju politička stranka je iskazala obaveze prema pravnim licima: „Bemust“ d.o.o. u iznosu od 13.412,31 KM, GIK „Oko“ d.d. u iznosu od 10.842,40 KM, „Avaz“ d.o.o. u iznosu od 5.444,58 KM, „OBN“ u iznosu od 20.000,00 KM i JP „Hit“ Radio televizija Brčko u iznosu od 4.018,08 KM.

Centralna izborna komisija Bosne i Hercegovine je od političke stranke zatražila da dostavi izvode otvorenih stavki na dan 31.12.2022. godine za pravna lica: „Bemust“ d.o.o., GIK „Oko“ d.d., „OBN“, „RADON PLAZA HOTEL“ i JP „Hit“ Radio televizija Brčko.

Uvidom u izvode otvorenih stavki koje su dostavili dobavljači, a Savez za bolju budućnost BiH iste nije ni potvrdio, niti osporio, utvrđeno je da obaveze političke stranke na dan 31.12.2022. godine prema GIK „Oko“ d.d. Sarajevo iznose 10.842,40 KM, „Avaz“ d.o.o. Sarajevo 5.444,58 KM, „OBN“ d.d. Sarajevo 0,00 KM i „HIT“ d.o.o. Brčko 3.766,53 KM.

Na osnovu eksternih izvora utvrđeno je da je nad pravnim licem NIŠTP „BEMUST“ EXPORT IMPORT pokrenut stečajni postupak, te da je navedeno pravno lice brisano iz registra privrednih subjekata.

Navedeno ukazuje da politička stranka ne vrši usaglašavanje svojih obaveza sa dobavljačima i da nema tačne evidencije o svojim obavezama.

Ističemo da politička stranka na kontu 128120-*Potraživanja za date avanse* na dan 31.12.2022. godine iskazuje saldo u iznosu od 92.689,20 KM⁶, što takođe upućuje da nije vršila usaglašavanje svojih obaveza sa dobavljačima, odnosno da troškovi nisu evidentirani u poslovnim knjigama u periodu u kojem su nastali.

- (9) Savez za bolju budućnost BiH nije u postizbornom finansijskom izvještaju iskazao tačne podatke o donacijama i troškovima predizborne kampanje, čime je prekršio odredbe člana 12. stav (3) Zakona o finansiranju političkih stranaka, člana 15.1 stav (1) Izbornog zakona Bosne i Hercegovine i odredbe Pravilnika o predizbornim i postizbornim finansijskim izvještajima političkih stranaka („Službeni glasnik BiH” br. 10/18 i 5/22).
- (10) Pregledom knjigovodstvene dokumentacije utvrđeni su nedostaci kod računa dobavljača, koji su knjigovodstvene isprave o nastalim poslovnim događajima.⁷

- Politička stranka je dostavila Ugovor o poslovnoj saradnji za usluge marketinške kampanje na društvenim mrežama sa pravnim licem „Purple Key“ d.o.o. Sarajevo, te račune za izvršene usluge.

Uvidom u Ugovor o poslovnoj saradnji, utvrđeno je da vrijednost ugovora iznosi 23.692,50 KM. Pregledom računa broj: RACUN-33-08-22 od 11.08.2022. godine u iznosu od 11.846,25 KM i broj: RACUN-19-09-22 od 05.09.2022. godine u iznosu od 11.846,25KM, utvrđeno je da isti ne sadrže pojedinačnu cijenu i broj oglašavanja na društvenim mrežama, niti dokaze o broju prikazanih oglasa.

- Kontrolom troškova reprezentacije i računa dobavljača „Avaz“ d.o.o. Sarajevo-Hotel “Radon Plaza” broj: 2079/22 od 27.04.2022. godine u iznosu od 5.880,00 KM, utvrđeno je da je na računu navedena samo usluga hrane, bez specifikacije koja bi sadržavala vrstu i količinu hrane.

⁶ Saldo na ovom kontu na dan 31.12.2021. godine iznosio je 57.884,27 KM.

⁷ U skladu sa računovodstvenim propisima, sadržaj knjigovodstvene isprave mora nedvojbeno i vjerodostojno pokazivati vrstu i obim nastale promjene (kupovina, količina, cijena, ukupan iznos), karakter poslovne promjene u knjigovodstveno-tehničkom smislu, tehnička obilježja i sl.

- Uvidom u račun dobavljača „Hotel Sax“ vl. S.A., Gračanica, broj: 736/2022 od 17.09.2022. godine u iznosu od 680,00 KM za usluge noćenja sa doručkom utvrđeno je da na istom nisu navedeni podaci o licima koja su koristila smještaj.
- Uvidom u račun pravnog lica „Lombardija d.o.o. Brčko od 09.09.2022. godine za nabavku vode, sokova i alkoholnih pića u iznosu od 1.781,00 KM utvrđeno je da isti ne sadrži elemente knjigovodstvene isprave (račun nije numerisan te ne sadrži jediničnu cijenu artikala, porez na dodatu vrijednost iako je pravno lice PDV obveznik).

e) Namjenski račun za finansiranje kampanje tokom Općih izbora 2022. godine.

Kao transakcijski račun koji je, u skladu sa odredbama člana 4.4 stav (1) Izbornog zakona BiH, bila obavezna otvoriti i namjenski koristiti za finansiranje izborne kampanje, stranka je prijavila transakcijski račun stranke broj: 1027080000035947 kod Union banke dd.

Kontrolom izvoda sa transakcijskih računa utvrđeno je da je stranka sa namjenskog računa za finansiranje kampanje isplatila plaće i dodatke zaposlenicima za mjesec septembar.

Troškovi izborne kampanje

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM⁸ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH politička stranka je u svrhu izborne kampanje mogla da potroši sredstva u iznosu od 2.226.257,32 KM.

Pored iskazanih troškova izborne kampanje u iznosu od 573.745,54 KM u toku obavljanja pregleda utvrđeno je da je Savez za bolju budućnost BiH ostvario i troškove izborne kampanje u iznosu od 98.991,28 KM⁹.

Naime, politička stranka je troškove izborne kampanje u iznosu od 2.461,00 KM umjesto u obrascu 4.2, iskazala u obrascu 4.1 godišnjeg finansijskog izvještaja, dok troškove izborne kampanje u iznosu od 96.530,28 KM uopšte nije iskazala u godišnjem finansijskom izvještaju za 2022. godinu.

5.2 PREPORUKE

Preporučuje se Savezu za bolju budućnost BiH da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da program utroška sredstava sačinjava u skladu sa obimom poslovanja i da finansijska sredstva obezbijedena za finansiranje stranke troši u skladu sa svojim programom i statutom,*
- *da u skladu sa odredbom člana 5. stav (4) Zakona o finansiranju političkih stranaka, sve priloge prijavljuje u finansijskom izvještaju,*
- *da se ne finansira iz zabranjenih izvora i donacija iznad zakonom propisanog limita,*
- *da poslovne knjige vodi u skladu sa računovodstvenim propisima, odnosno da vodi pravilne i potpune evidencije o osnovnim sredstvima, gotovom novcu, prihodima, rashodima i obavezama,*
- *da finansijske izvještaje koje podnosi Centralnoj izornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka i Pravilnikom o predizbornim i postizbornim finansijskim izvještajima političkih stranaka,*
- *da sadržaj potvrde uskladi sa odredbama člana 6. Pravilnika o godišnjim finansijskim izvještajima političkih stranaka,*

⁸ Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

⁹ Ovaj iznos nije konačan jer nisu iskazani troškovi korištenja sala i dvorana tokom kampanje za Opće izbore 2022. godine.

- *da upravljanje gotovinom putem blagajne uspostavi u skladu sa principima i pravilima blagajničkog poslovanja i*
- *da izvrši usaglašavanje obaveza sa dobavljačima, te provede odgovarajuća knjiženja u svojim poslovnim knjigama.*

KOMENTAR:

U ostavljenom roku, Savez za bolju budućnost BiH nije se očitovao na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2022. godinu.

Šef Odsjeka za revizijske poslove

Sanja Tošović

Revizor

Tanja Golijanin